

ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XXXIX Ihap 15
Agosto 7, 2008
www.philippinerevolution.net

Editorial

Pabug-at nga VAT, ibasura!

Haros waray iba nga unod an masobra usa kaoras nga State of the Nation Address (SONA) ni Gloria Arroyo kundi an pagdepensa ngan paghatag-rason ha pag-imponer han Value Added Tax (VAT). Direkta niya nga iginbasura an hiluagan nga panawagan han katawhan Pilipino kontra ha VAT ngan iginrason an dako nga pundo nga nakokolekta tikang dinhi nga nagseserbe nga asya la an "depensa" han mga kablasanon atubangan han presente nga grabe nga krisis ha ekonomiya.

Ha pagdinepensa ni Arroyo ha VAT, ginpamatud-an na liwat niya an iya leyaltyad ha imperyalismo ngan hugot nga pagsunod ha mga palisiya han imperyalista nga "globalisasyon." An pag-umento ngan pagpahiluag han VAT usa ha mga partikular nga palisiya nga igindikta han IMF ngan World Bank ha niyu-tiyo nga rehimen hadton 2006. Hini nga mga naglabay nga semana, pira kabeses nga nagpahimatngon an IMF-WB kontra ha pagtanggah han VAT. Para ha IMF-WB ngan rehimen US-Arroyo, an VAT an yawe nga palisiya para padayon nga makabayad han langyawanon nga utang, igpabilin nga nabiyaw an bangkrap nga gobyerno ngan pugngan an utro nga

paggurak han krisis ha pinansya.


Agud magin makaru-karawat ha katawhan an padayon nga pag-imponer han paras-anon nga VAT, iginhan-ay ni Arroyo an iya mga buaw nga programa nga kontra-kapobrihan. Gin-ngaranan niya nga "Katas ng VAT" an mga programa nga "subsido." Ginpapagawas nira Arroyo nga "pagpulos" ini han katawhan tikang ha VAT. Pero an ungod ginkakawat la an dako nga bul-to hini samtang nanhahatag hin makairinsulto nga sinsilyo nga limos ha mga naghihimakuri.

Iginhihinambog ni Arroyo nga an dako nga dugang nga kita ha VAT ha lana nahingangadto ha mga kablasanon. An ungod, ikatulo la han gintatantiya nga P30 bilyones nga dugang nga kita ha VAT yana nga tuig an igin-alotaga niya ha mga pasikat nga programa nga "pansubsido." Sugadpaman, ribrib pa gihapon hini an nahingangadto ha mga kablasanon. Tinuyo nga waray istrikto nga sistema hin awditing ini para an dako nga parte hini mahibursa nira

Arroyo ngan iya mga niyu-tiyo. Naglalaway hira ha "Katas ng VAT" para labaw pa hira nga makagpatakas ngan mas mapadako pa nira an ira pundo para ha mga pampolitika nga maniobra nga makagpabilin ha ira ha

poder lahos ha 2010.

Subay ha mando han IMF-WB, an prinsipal ngan tikadako nga angay pag-alotagahan han VAT amo an



Mga landaw hini nga isyu...

<p>Hiluagan nga protesta iginlansar ha SONA PAYPAY 4</p>	<p>Erestorya nga MILF-GRP PAYPAY 7</p>	<p>Dole-Stanfilco, ginsirutan han BHB PAYPAY 12</p>
---	---	--

pambayad ha pan-gawas nga utang han gobyerno. Tikang 30% la hadton 2006, naabot na ini yana ha 70% han VAT. Hini nga 2008, ₱634 bilyones o 24% han badyet han reaksyunaryo nga gobyerno an igin-aalotaga nga pambayad han interes hini.

Dako liwat nga parte han kadugangan nga kita ha VAT an mahingangadto ha Armed Forces of the Philippines (AFP). Igin-anunsyo diri pala maiha nga dako nga parte hini an igpapalit hin pira nga bag-o nga helikopter para ha militar. Yana nga tuig, nag-alotaga an rehimen Arroyo hin ₱5 bilyones para ha Capability Upgrade Program han AFP para mas magin epektibo kuno ini ha pag-ato ha mga rebolusyunaryo nga pwersa, bisan pa man kun giklaruhi nga an agay agap nga tagan hin prayoridad amo an grabe nga kamutangan han panginabuhi han katawhan.

Butad nga nagbinuwa hi Arroyo han sidngon niya nga "mga rikuhanon" la an magpupulos kun tatanggalon an VAT ha lana. An tinuod, kada pag-umento han presyo han mga paplitan ngan serbisyo ngan kasagubay nga pagdako han buhis

nga nakaimponer dinhi, nabagsak an pa-nginabuhi han milyun-milyon nga pamilya. Kun hadto unob na nga pinakadako nga porsyento han buhis nga nakokolekta han gobyerno diri tikang ha "mga rikuhanon" kundi ha masa nga anakpawis ngan yano nga mga empleyado, nag-uraura pa ini han pahiluagon an lupgop han VAT. An pag-tanggal bisan namanla han VAT ha lana magdudurot hin kadagmitan nga kahalayahay ngan dugang ha kada adlaw nga kita han milyun-milyon nga mga drayber han dyip ngan traysikol, mga pasahero, gudti nga parag-uma ngan parupangisda; mga pamilya nga nagamit hin LPG ngan petrolyo; ngan damo pa nga iba.

Bilyun-bilyon kapesos an gin-hahakin yana han rehimen resulta han waray hunong nga pag-umento han mga paplitan ngan kasagubay nga pagdako han nasusukot nga VAT. Samtang naumento an presyo, nagtitikadako pa an nakokolekta nga VAT. Hini nga syahan nga tunga hin tuig han 2008, inabot na ha ₱53 bilyones an kabug-usan nga nakolekta nga VAT, kun diin sobra katunga resulta han pag-umento han presyo han lana.


Paborable ha sugad kan Arroyo an hi-taas nga tantos ha implasyon, samtang nagdudurot naman ini hin grabe nga pagkukuri ha katawhan.

Sanglit paman pursigido nga igin-sasalikway ni Arroyo an panawagan nga igbasura an VAT, labina adton igin-iimponer ha mga produkto nga petrolyo. Tungod ha lupgop ngan kadako han nakokolekta tikang hini, artipisyal hini nga napupugngan an paggrabe han krisis pampinansya ngan padayon nga kabangkrap han gobyerno. Iginpipirit ni Arroyo an padayon nga pag-imponer han VAT tungod kay an kamatuoran, ini an nagsasalbar ha iya rehimen atubangan han krisis nga iginbunga han iya kamasinugtanon ha mga imperyalista, kahamad ngan kapasibaya.

Ha luyo han padayon niya nga pagbinuwa ha katawhan ngan paglinarang hin mga pan-nguwat, maaram hi Arroyo nga diri ha iya natuod an mayoriya han katawhan. Natigdamo an mga tiarato ngan nagtitikadako an ayat ha plano niya nga padayon nga maghadi lahos ha 2010. Sanglit gintapos niya an iya SONA nga may-ada estilo hin panarhug ngan pahimatngon ha hin-o man nga mag-uulang ha iya mga plano ngan programa.

Pero nagsasayop hiya ha pag-amburong nga nahahadlok pa ha iya an mayoriya nga naghihimaruydoy na nga katawhan. Nagtitikadamo an ura-ura nga nalalangot ha peke nga presidente ngan iya rehimen. Nahusgaran na hiya han nagugutom ngan tiniyupi nga katawhan.

Padayon nga nabubug-os an uranos han pagrerebolusyon. Ha hiluag nga kabaryuhan, narabunos an gera han katawhan ngan nagtitikaagsub an mga taktikal nga opensiba han Bagong Hukbong Bayan kontra ha mga pasista nga harigi han rehimen. Ha tawuon nga kabungtuhan, kasyudaran ngan sentro han papet nga reaksyunaryo nga gahum, nasamwak an mga protesta ngan nagtitirok hin kusog an katawhan para patalsikon an kinangangalsan nga rehimen. **AB**

 <p>Tuig XXXIX Ihap 15 Agosto 7, 2008</p> <p>Igin-gagawas an <i>Ang Bayan</i> ha yinaknan nga Pilipino, Bisaya, Iloko, Hiligaynon, Waray ngan Ingles.</p> <p>Mahihimo ini nga i-download tikang ha Philippine Revolution Web Central nga makikita ha:</p> <p>www.philippinerevolution.net</p> <p>Nakarawat an <i>Ang Bayan</i> hin mga kontribusyon ha porma hin mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton pahayagan. Maaabot kami pinaagi han mga email ha:</p> <p>angbayan@yahoo.com</p>	<h2 style="text-align: center;">Gin-uunod</h2> <hr/> <p>Editorial</p> <p>Pabug-at nga VAT, ibasura! 1</p> <p>Hin-o an nagbabayad han VAT? 3</p> <p>Mga buwa ni Arroyo 4</p> <p>Welga ha Bikol 4</p> <p>Protesta kontra-SONA 5</p> <p>Kay-ano nga hitaas pa gihap an presyo han lana 6</p> <p>Kasarabutan han MILF ngan rehimen Arroyo 7</p> <p>Kriminal nga pagpasibaya ha mga migrante 8</p> <p>Bayad ha leyaltad 10</p> <p>Ismagling, papremyo kan Enrile 11</p> <p>Magdinaugon nga TO</p> <p>DOLE-Stanfilco, ginsirutan 12</p> <p>Kadaugan ha Abra 12</p> <p>Pinakaurhi nga mga aksyon militar han BHB 13</p> <p>Ukoy-bubto, diri makarukarawat 14</p> <p>Panhihibang han pasista nga estado</p> <p>Militarisasyon ha kabaryuhan 15</p>
<p>Iginpupublikar an <i>Ang Bayan</i> duha kabeses kada bulan han Komite Sentral han Partido Komunista han Pilipinas</p>	

Hin-o an tinuod nga nagpapas-an han VAT?

Usa ha pinakadako nga pagbinuwa han naglabay nga SONA an pag-pinirit ni Arroyo nga "mga rikuhanon" (mga higtaas nga klase) an prinsipal nga nagpapas-an ha VAT ha lana ngan kuryente tungod kay hira an may-ada pinakadagko nga ginkokonsumo hini. Ginpanhimuwa ini han mga istadistika mismo han iya gobyerno. Kabaliskaran ha ginsesering niya nga 84% han lana ngan 90% han kuryente an ginkokonsumo han "mga rikuhanon," ha aktuwal an mga pamilya nga may-ada gudti tubtub kasadangan nga kita an nagpapas-an ha haros 90% han nakokolekta nga VAT.

Sumala mismo ha mga istadistika han Meralco, an masunod an aktuwal nga konsumo han katawhan ha kuryente: 34.41% ha sektor han industriya; 28% ha sektor han komersyo; 3.42% ha mga pampubliko nga bilding ngan suga ha kalsada; ngan 34.11% ha mga residensyal nga konsumedor. Samtang ginkokonsumo gud man han syahan nga duha nga sektor an 62.4% han produkto nga kuryente, iginpapasa naman nira an buhis nga igin-iimponer dinhi ha ira mga konsumedor pinaagi han pagdudugang hini ha presyo han ira mga produkto ngan serbisyo. Bisan an kalugaringon nga gastos ha kuryente han Meralco ngan iba pa nga nagbaligya hin kuryente iginpapabaton ha mga konsumedor han kuryente. An VAT naman nga nakaimponer ha pagpalamrag han


han rehimen tikang ha katawhan. Ha mga residensyal nga konsumedor (ikaduha nga pinakadako), 10% la an nakonsumo hin sobra 500 kWh kada bulan. An dako nga mayoriya amo an mga gin-ngangaranan nga abereyds ngan *lifeline users* nga diri nahalos ha 100 kWh an kinokonsumo. Hira an aktuwal nga pinakahiluag nga base nga direkta nga ginhuhuthutan han VAT.

An konsumo naman han lana nasubay ha masunod: 10% ha pagprodyus hin kuryente; 9.7% ha direkta nga gamit han mga residente, prinsipal na ha porma han *liquefied petroleum gas* (LPG) ngan petrolyo; 57.2% ha transportasyon; 14.8% ha industriya; 5.2% ha sektor han komersyo; ngan 2.5% ha agrikultura. An sektor han transportasyon nga asya an nakonsumo han pinakadako nga bulto han mga produkto nga petrolyo ginkokomponer na-

transportasyon (labot ha traysikol); 47.9% ha mga traysikol ngan motorsiklo; 17.1% ha mga pribado nga awto; ngan 5.5% ha mga trak ngan trailer nga pandeliber. Nagawas nga sobra 56% han lana an direkta nga ginkokonsumo han ordinaryo nga mulupyo ha porma han gamit han mga residente, pampubliko nga transportasyon ngan talagudti nga pag-uma ngan pangisda. Kadakan han iba pa amo an diri liwat direkta nga ginkokonsumo han ordinaryo nga mulupyo pinaagi han mga pinaalit nga produkto ngan serbisyo.

Diri mahililikaw hini nga mga istadistika an bilyun-bilyon kapesos nga ginhahakin han rehimen tikang ha katawhan nga direkta nga nakonsumo han mga produkto nga petrolyo kada adlaw. Ha syahan nga pito pala kabulan hini nga tuig, sobra P20 bilyones na an direkta nga nahuthot han rehimen Arroyo ha ordinaryo nga mga mulupyo nga VAT ha lana ngan kuryente. Kalakip dinhi an masobra P14 bilyones tikang ha ginpalit nga krudo han mga drayber han dyip, haros P3 bilyones ha ginkonsumo han mga drayber han traysikol ngan P1.6 bilyones ha ginkonsumo han mga parupangisda. Aada ha P1.5 bilyones naman an gintatantiya nga nahuthot nga VAT tikang ha mga pobrihanon nga pamilya nga nagamit hin petrolyo. Mamadako pa an VAT nga nahuhuthot ha ira ha diri direkta nga paagi.

Sumala ha mga pag-aram, an mga buhis nga sugad han VAT nga igin-iimponer pareho ha produksyon ngan pagbaligya (*sales*), labina ha yano nga konsumo ngan serbisyo, mamadako an ginkakaon ha kita han mas pobrihanon nga pamilya. Ginlalamon han sugad nga klase nga mga buhis an 28% han kita han pinakakablas nga pamilya itanding ha 9.86% la han mga kita han mga rikuhanon nga pamilya. AB



kalsada ginbabaydan liwat han mga buhis nga direkta nga ginkokolekta

man han masunod: 29.5% ha pampubliko nga

Dugang nga pagbinuwa ngan pagtuis ha SONA 2008

Kabaliskaran ha iginhambog ni Gloria Arroyo ha iya SONA nga Kpinakahibubo yana an tantos han kapobrihan ha nasud sakob hin 20 anyos, dugang ini nga nagtitikagrabé ilarum han iya paghahadi. Hini nga naglabay nga pito katuig, linuros hin 20% an kita han ordinaryo nga mulupyo.

Sumala mismo ha istadistika han gobyerno, naabot na ha P900 yana nga 2008 (tikang P400 hadton 2001) an ginkikinahanglan han usa nga unom-katawo nga pamilya ha kada adlaw para mabuhi hin disente ha Metro Manila. Gintatago liwat ni Arroyo an kamatuoran nga sobra 10 milyones nga Pilipino an waray trabaho o nagbibiling pa hin kadugangan nga trabaho samtang sobra na 14 milyones an nagpalangyaw-nga-labnasan para magpakabuhi.

Iginhambog liwat ni Arroyo nga P32 nala kada kilo an presyo han komersyal nga bugas. Pero sigon mismo ha National Food Authority (NFA), hadton Abril pa an nasering nga presyo. Tikang hadto ngada hini nga Hulyo, nakantidad na an komersyal nga bugas hin P39 tubtub P45 kada kilo. An waray niya luwasa amo an walatuo nga mga anomaliya ha pagbaligya han barato nga bugas han NFA para kuno ha mga kablasanon. Gin-amin mismo ni Social Welfare Secretary Esperanza Cabral nga ha Metro Manila pala, sinobra hin 420,000 an ihap han natagan kuno hin "family access cards" para makapalit hin bugas han NFA ha presyo nga P18.75 kada kilo.

Nagbinuwa pa hi Arroyo nga 10% la han nakokonsumo naton nga bugas an gin-iimport han nasud. An ungod hadton 2007, inabot na ini ha 14% ngan nagtitikadako pa ini yana nga tuig.

Iginhambog niya nga tikang 2001 inabot ha "makasaysayan" nga 1.5 milyones kaektarya nga kahagnaan an may-ada na irigasyon.

Waray niya igdabi nga 32% la ini han kabug-usan nga agrikultural nga katunaan ha nasud--mas menos itanding ha mga nasud han Thailand ngan Vietnam.

Iginhambog niya nga pira na kabeses nga dinako an suporta ha mga iskolar ha kolehiyo ngan dinako hin upat kapilo an para ha hayskul. An waray niya igsumat tikang 2001 tubtub 2007, ginuti hin 2.4% an parte han nasyunal nga badyet nga igin-aalotaga han iya rehimen ha kada istudyante, ngan tikang 2000 tubtub 2007, binagsak hin 14% an ihap han mga aktuwal nga nakakaeskoyla nga bata nga aada ha edad para umeskoyla.

Naghambog pa hiya nga tungod kuno ha iya pakimaluoy ha mga kompanya ha telekomunikasyon, ginmenusan na hini nira hin 50 sentimos an sukot ha kada mensahe nga teks. An ungod, usa la ini nga "promo" nga maiha na nga ginhihimo han nase-



ring nga mga kompanya (nga mapapahimulsan la ha kantidad nga P20 kada adlaw). Nagsering liwat an mga kompanya ha telekomunikasyon nga tubtub la Oktubre ini nga "promo", bisan kun abrido hira nga pahilawigon pa ini enkaso damo gud man an maengganyar hini. AB

Ukoy-pasada ha Bicol, iginlansar

Hiluagan nga ukoy-pasada ha Bicol an iginlansar han mga drayber ngan opereytor dinhi komo baton ha nahuman pala nga SONA ni Arroyo. Sumala ha Concerned Drivers and Operators for Reform (Condor-Piston) ha Bicol, naparalisa hini nga Hulyo 29-30 an 99% han pampubliko nga transportasyon ha Camarines Norte ngan Sorsogon. Setenta y singko porsyento naman an paralisasyon ha Camarines Sur. Naglansar naman hin protesta ha Masbate ngan Catanduanes.

Samtang, naglansar liwat hin "fish strike" an mga parupangisda ha pangunguna han Pamalakaya ha Albay, Catanduanes ngan Sorsogon. Ini an ira baton ha padayon nga pag-umento han presyo han lana. Igin-insister liwat nira nga igbasura an VAT ngan deregulasyon ha lana. Kalakip ha mga nakiusa an mga drayber han mga bus nga de-aircon, mga traysikol ngan van. AB

Hiluagan nga protesta, iginlansar ha SONA ni Arroyo

Wala-tuo nga protesta an iginlansar ha adlaw han State of the Nation Address o SONA han rehimen Arroyo ha pangunguna han iba-iba nga progresibo nga organisasyon ngan mga kaalyado hini.

Gin-ngaranan nga "People's SONA" an mga gios-protesta tungod kay, sering han Bagong Alyansang Makabayan (BAYAN), an ungod nga *state of the nation* mahibabaruan ha kakalsadahan ngan diri ha mga pagbinuwa ni Arroyo ha Batasang Pambansa. Ginkondenar nira an rehimen Arroyo ha baratunon hini ha padayon nga pag-umento han presyo han lana ngan iba pa nga papliton ngan pankabug-usan nga krisis ha ekonomiya. Iginpanawagan nira an pagbasura han 12% nga Value Added Tax (VAT) ha lana ngan han Oil Deregulation Law ngan an pag-umento han suhol han mga trabahador.

Gintatantiya nga inabot 13,000 an mga demonstrador nga nagrali ha Commonwealth Avenue ha Quezon City. Temprano pa nagtirirok na hira ha yungod han Ever Gotesco Mall. Nangaon hira hin lugaw komo simbolo han kapobrihan ngan padayon nga pag-antos han katawhan ilarum han pamumuno ni Arroyo. Ginsunog nira an 21 pye nga *effigy* nga nagpapakita kan Arroyo nga nasakay ha usa nga edro kaupod an amo nga Amerikano samtang nalulunod an barko nga "MV Pilipinas."

Antes umudto nag-walk-out tikang ha sesyon *hall* han Batasang Pambansa an lima nga representante han mga progresibo nga partido. Magkasaragubay ngan alsa-kamot nga ginawas han Batasang Pambansa hira Rep. Satur

Ocampo ngan Teodoro Casiño han Bayan Muna, Rep. Liza Maza ngan Luzviminda Ilagan han Gabriela Women's Party ngan Rep. Rafael Mariano han ANAKPAWIS.

Pinartisipar liwat ha gios-protesta an iba-iba nga grupo sugad han United Opposition, Bangon Pilipinas Movement, Be Not Afraid Movement, Kilusang Makabansang Ekonomiya, Integrated Bar of the Philippines, White Ribbon Movement ngan Concerned Citizens' Movement ngan bisan an Philippine Nurses Association.

Protesta ha iba-iba nga parte han nasud. Ha Baguio, nagmartsa ha sentro han syudad an mga membro han Kilusang Mayo Uno (KMU), Anakbayan, Kalipunan ng Damayang Mahihirap (KADAMAY) ngan League of Filipino Students (LFS). Waray nira asiha an uran nga durot han bagyo "Igme" lugod mapaso an ira guliat nga patalsikon hi Arroyo.



Samtang, ha Angeles City, nagralian mga membro han Bayan-Gitnang Luzon. Ha Laguna, ginsunog han Anakbayan-Timog Katagalugan an usa nga *effigy* ni Arroyo. Kaparte an ira protesta han 18 diyas nira nga *caravan* ha bug-os nga Southern Tagalog.

Ha Quezon, iginlibot han Anakbayan an usa nga *effigy* nga halas nga naglaladawan kan Arroyo ngan terorista hini nga kampanya kontra ha mga progresibo nga organisasyon ngan katawhan. Nagkamay-ada liwat hin rali ha syudad han Antipolo ngan bungto han Cainta ha probinsya han Rizal ngan ha Bacoor, Cavite.

Ha Bicol, iginlibot tikang Peñaranda tubtub Pinaglabanan Monument ha Legazpi City an usa nga *effigy* ni Arroyo nga nahigda ha kwarta nga ira ginsunog katapos han martsa. Hugot nira nga gintipahan an konstruksyon han Daraga International airport nga usa ha mga pryoridad ni Arroyo.

Inabot naman hin 2,000 an nagprotesta ngan nagmartsa ha Bacolod City. Pinartisipar ha demonstrasyon an mga istudyante han University of Negros Occidental-Recoletos. Usa nga *effigy* ni Arroyo nga may porma nga kugita an ginsunog ha rali.

Grabe nga kalangot nga ginbalong hin lagay han mga nagpoprotesta an retrato ni Arroyo atubangan han National Food Authority ha opisina hini ha Jaro, Iloilo City. Kaparte la ini han mga gios-protesta ha Iloilo City, Roxas City ngan Kalibo, Aklan nga ginpartisiparan hin 3,500 katawo.

Inupod hini nga mga gios-protesta an tag-iya ngan mga empleyado han Jumbo

Fishing Corporation ha Iloilo City. Nagbitay hira hin mga istrimer

ha ira mga barko ha Muelle Loney Port nga nag-uunod han ira protesta ha hitaas nga presyo han petrolyo ngan VAT. Usa naman nga gios-protesta an iginlansar han 300 nga kaapi han BAYAN atubangan han Malacañang ha Sugbo ha Cebu City. Nanawagan hira ha mga mulupyong didto nga parungon an radyo o telebisyon samtang nanmumulong hi Arroyo.

"Papet, pasista, pakuri ha masa nga hi Gloria!" an gu-liat han mga nagmartsa ha Cagayan de Oro. Nagpasundayag liwat hira hin drama hiunong ha paragbarang nga nagluluto hin kontra-katawhan nga mga balaud nga nagtutudlok kan Arroyo.

Ha Davao, iginlansar an "tinuod nga *state of the nation address*" ha usa nga rali nga gintambongan hin 5,000 katawo ha Freedom Park ngan Rizal Park. Hugot naman nga ginkondenar han KMP-Davao ngan mga Lumad ilarum han Pasaka an kapakyasan han rehimen Arroyo nga igpatuman an reporma nga agraryo ngan an pagtabrog ha mga Lumad ha ira katunaan.

Kadungan hini, naglansar naman hin kalugaringon nga SONA an masobra 100 nga lider han mga nasyunal nga minoriya tikang ha iba-iba nga dapit han Mindanao nga gintituloan nira nga State of the Indigenous People's Address (SIPA) ha syahan nga gab-i han ira tulo kaadlaw nga komperensya.

Naglansar hin paggios an mga membro han Suara Bangsamoro ngan Liga ng Kabataang Moro ha Cotabato City agud kondenaron an nagtitikagrabe nga militarisasyon ha Mindanao nga nagbibiktima ha mga Moro. An kawaray liwat hin ayuda han gobyerno ha mga Moro an nagbubunga ha grabe nga kapobrihan ngan nagtitikagrabe nga kasamukan ha Mindanao ngan ha isla han Basilan.

Nagprotesta naman an mga membro han GABRIELA atubangan han Western Mindanao University ha Zamboanga City. Waray kabungkag an ira han-ay ha luyo han pag-atentar han mga tauhan han munisipyo.

Protesta ha langyaw nga labnasan. Ha US, pinangunahan han BAYAN-USA an gios-protesta ha konsulada han Pilipinas ha New York, Los Angeles ngan San Francisco. Pinangunahan naman han United Filipinos in Hongkong (UNIFIL) ngan Migrante International-Hongkong an rali atubangan han konsulada han Pilipinas ha Hongkong. Ginkondenar nira an pagpasibaya han rehimen ha mga migrante nga trabahador nga Pilipino.

Naglansar naman hin "Pagsambang Bayan" ha Vancouver City, Canada an mga kaapi han Canada-Philippine Solidarity for Human Rights. Nagkamay-ada liwat gios-protesta ha syudad han Montreal ngan Ottawa. Naglansar liwat hin mga aksyon protesta ha mga syudad han Melbourne ngan Sydney ha Australia. Ha Okinawa City, Japan naman, naglansar hin talakayan an mga Pilipino ngan Japanese hiunong ha kamutangan han Pilipinas. **AB**

Kay ano nga hitaas pa gihapon an presyo han lana

Padayon nga naghahakin hin mas dako nga su-perganansya an mga langyawanon nga korporasyon ha lana ha Pilipinas tungod kay padayon nira nga iginraraysang an presyo han lana ha hitaas nga lebel bisan kun linuros na hin tala an presyo han lana ha pankalibutan nga merkado. Atubangan han haros \$20-25 nga pagbagsak han presyo han kada dram han krudo nga lana hini nga katapusan han Hulyo, riniwa an dagko nga langyawanon nga korporasyon nga menusan an ira mga presyo ha

rason nga may-ada pa "mga kalugian nga kinahanglan bawion."


Hini nga mga syahan nga adlaw han Agosto, tala man nga linuros ha \$118 kada dram an presyo han krudo nga lana (pareho han presyo hadton katapusan han Abril) tikang ha pungkay hini nga \$147 hadton pag-entra han Hulyo. Kun pagbabasaran an presyo han krudo nga lana ha pankalibutan nga merkado, angay kunta pahibubon na an presyo han mga lokal

nga produkto nga petrolyo ha lebel hini hadton katapusan han Abril. Hadto, an kada litro han *diesel* nakada ha ₱37.91-42, an petrolyo, ha ₱42.30-47.80 ngan an gasolina ha ₱45.17-49.65.

Kahuman gumawas an notisya nga linuros an presyo han krudo nga lana ha pankalibutan nga merkado, iginpatuman han mga kompanya ha lana an gutiayay nga pag-iban ha presyo. Hini nga Hulyo 31, ginpamenusan han Petron, Caltex ngan iba pa nga kompanya hin ₱1.50 an presyo han kada litro han gasolina pero waray pamenusi an presyo han *diesel*.

sundan ha "Lana...", *paypay* 7

ANG BAYAN Agosto 7, 2008



Erestorya pankamurayawan ha MILF


Gin-gagamit han rehimen para ha kalugaringon nga interes

Pan-nguwat, pagtraydor ngan panabotahe an ginhihimo han rehimen Arroyo ha erestorya pankamurayawan hini ha Moro Islamic Liberation Front (MILF). Nakikignegosasyon kunuhay ini ha MILF pero an ungod nga tuyo han rehimen Arroyo amo an gamiton an proseso pankamurayawan para utro nga igduso an larang hini nga *charter change* o pagbabag-o han konstitusyon. Kun pananglitan bumalik ha pursigido nga paglalansar hin armado nga pakig-away an MILF, gagamiton liwat ini nga daitlanan ni Arroyo para makaglansar hin todo-todo nga opensiba militar ngan mag-imponer hin *emergency rule* kun diri man balaud militar.

Waray anuman nga intensyon an rehimen nga respetuhan an katungod han MILF ngan sumunod ha mga ginkasarabutan. Nakikignegosasyon la ini ha MILF para pakusgon an natigluya na nga kapyot ni Arroyo ha poder ngan mauwat an mga rebolusyunaryo nga pwersa nga Moro nga umentra ha ura-

ura kaiha nga ukoy-bubto, magin pasibo ha militar nga karukayaknon ngan sumurender.

Sanglit pa man nagpabilin nga dagkot-parong ngan impormal an erestorya pankamurayawan han rehimen Arroyo ngan MILF tikang pa hadton 2001. An mayor gudla nga ginkasabutan amo an usa nga maiha



ngan alang-alang nga ukoy-bubto. Tuyo la hini nga pangarulon an mapan-ato nga diwa han Bangsamoro Islamic Armed Forces, paluyahon an MILF tubtub nga mapresyur ini nga umabuyon ha gudti la nga konsesyon

"Lana...", tikang paypay 6

Sinunod dinhi an Shell, nga nagmenos liwat han presyo han *diesel* kahuman hini umentuhan hin ₱1.50 kada litro hadton Hulyo 25. Ha yana, aada pa gihapon ha ₱58/litro an *diesel*, ₱61/litro an petrolyo ngan ₱59/litro an gasolina.

Nagtikang ini bumagsak hini nga urhi nga semana han Hulyo resulta han dako nga pagluya han konsumo ha mga produkto nga petrolyo. Partikular ha US, nahireport nga nag-iban hin 16 bilyones kakilometro an iginbiyahe han mga biyahedor nga Amerikano hadton Marso 2008 itanding ha Marso 2007. Tungod liwat ha pag-umento han presyo han gasolina, nag-iban hin biyahe o nag-umento han pamasaha an dagko nga *airline*.

Ha Pilipinas, naabot ha 14 nga kompanya han pangisdaan ngan pagdelata hin sardinas ha Western Mindanao an nagserra o nag-iban han ira operasyon tikang hadton Hulyo 26 tungod ha hitaas nga presyo han lana. Inabot ha 50,000 nga trabahador an natanggal ha trabaho. Naaraba na liwat bisan an Jumbo Fishing Corp. ha Iloilo nga nagsering nga nagtitikadako an ira alkanse tungod ha pag-umento han presyo han lana ngan kadako han ginbabaydan nga buhis.

Hini nga Hunyo 2008, nagawas nga naibanan hin \$100 milyones an kita han Philippine Airlines tungod ha pag-umento han presyo han *jet fuel*. Nag-iiban na

liwat hin biyahe an Cebu Pacific.

Ha luyo hini, an presyo han lana pirit pa gihapon nga gin-uumentuhan han mga ispekulador ngan mga monopolyo nga korporasyon ha lana. Ha pagluros han presyo han lana, nagpagawas utro hin report an Goldman Sachs nga maabot pa gihapon ha \$149 kada dram an krudo nga lana pag-abot han katapusan han 2008. An Goldman Sachs amo an usa ha pinakadagko nga kapitalista ha pinansya nga dabi ha ispekulasyon ha lana.

Waray naman hunong an mga kompanya ha lana ha pagpagawas hin mga notisya nga nagsesering nga may-ada problema o magkakaproblema ha suplay han lana. Pirit nga ginsusung-an han US an iba pa nga alyado nga imperyalista an tensyon ha Iran ngan programa kuno nga nukleyar hini agud palandawon an tarhug han utro nga gerra ha Middle East.

Gindadaitlan liwat han mga kompanya han lana an mga atake ha mga *oil pipeline* ha Nigeria han mga lokal nga pwersa gerilya. Bisin paman kun waray aktuwal o mahinungdanon nga epekto ha suplay, gin-gagamit ini han mga kompanya ha lana ngan mga kapitalista ha pinansya para igduso an ispekulasyon nga maumento utro an presyo.

AB

ngan haros sumurender.

An ungod waray anuman nga intensyon an rehimen Arroyo nga uma-buyon ha mga yawe nga isyu nga igin-iinsister han MILF sugad han pagbalik han ira ansestral nga katunaan, pag-amkon han soberanya ha mga natural nga karikuhan ngan pagrespeto ha katungod han mga Moro ha kalugaringon nga pagdedesisyon ngan ha otonomiya. Tubtub ha katapusan, pirit nga ura-ura nga ginpapatarapsaw han mga negosyador ni Arroyo an usa nga boardador nga kasarabutan nga nagpapahinungod hini nga mga isyu. Nag-atentar pa nga magsingit hin mga amyenda an tuyaw nga mga negosyador han gobyerno ha dokumento nga ginkausahan na hin waray pagpahibaro ha mga negosyador han MILF. Ura-ura ini nga iginkangalas han MILF ngan nagresulta ini han pag-walk-out han mga negosyador nira hadton Hulyo 26.

Para bumalik an MILF ha negosasyon, naruyag kunuhay an rehimen Arroyo nga magpirmahay hini nga Agosto 5 ha Memorandum of Agreement (MoA) on Ancestral Domain, bisan kun maaram ini nga an pagpapahilapad han lugop han Bangsamoro Juridical Entity nga lahos ha presente nga sasrang ngan hagligot nga lugop han Autonomous Region for Muslim Mindanao (ARMM) hugot nga titipahan han mga naghadadi nga klase ha nasud, kaupod an

mga kapitalista nga nagtatag-iya han dagko nga minahan ha mga nadadabi nga lugar.

Labot pa ini ha pagtipa han iba-iba nga pwersa nga kontra-Moro ha mga lulupgupon nga lugar sugad han pira nga syudad, bungto ngan baryo ha Zamboanga del Sur, Zamboanga Sibugay, Lanao del Norte, Bukidnon, North Cotabato, Sultan Kudarat ngan Palawan. Diri la mga lokal nga naghadadi nga klase an gin-aantuman nga mariwa ha MoA. Segurado nga diri tutugutan han US ngan iba pa nga imperyalista nga may-ada dagko nga interes ha Mindanao nga magkamay-ada mga pagbabag-o nga makakaulang ha ira pandambong ngan panginginlabot ha isla. Giarami liwat hira Arroyo nga pupugngan han Korte Suprema an pirmahay han MoA antes an nakatalaan nga eleksyon ha ARMM yana nga Agosto. Pero tinuyaw nga iginsaad han mga negosyador ni Arroyo nga mahiooktaba an eleksyon para matagan-higayon kuno an pagpapatuman ha MoA.

Maaram liwat hira Arroyo nga damo pa an pag-aagian nga proseso an reaksyunaryo nga gobyerno antes maipatuman an usa nga plebisito hiunong ha isyu han ansestral nga katunaan han Bangsamoro. Ngan maaram liwat hira Arroyo nga subay ha mga proseso han reaksyunaryo nga gobyerno, kinahanglan anay maamyendaran an konstitusyon antes maipatuman an

pagpahiluag han teritoryo han Bangsamoro.

Tinuyo liwat nga iginsesekreto han rehimen Arroyo an gin-uunod han MoA para dugang nga mag-alsa an mga pwersa nga kontra-Moro ngan magresulta hin dugang nga kasamukan nga asya an sisingabuton han Malacañang para makagamit ini han kamot nga puthaw. Nangungudyot na an rehimen nga igdeklarar an pormal nga pagserra han erestorya pankamurayawan para makaglansar na ini hin todo-todo nga opensiba militar kontra ha MILF oras nga umato ini para depensahan an kalugaringon ngan mga komunidad han Moro kontra ha makusog nga pangangatake han AFP ngan iba pa nga mga armado nga pwersa nga kontra-Moro.

Hul-os an suporta han Partido Komunista han Pilipinas ha MILF ngan ha pakigbisog han kabug-usan nga Bangsamoro para ha nasyunal nga pagdedesisyon ha kalugaringon, pagbalik ha ira han ira mga ansestral nga katunaan ngan pagtagamtam han hul-os nga otonomiya. An pakig-away han Bangsamoro kaparte han kabug-usan nga nasyunal-demokratiko nga rebolusyunaryo nga pakigbisog. Pareho han ngatanan nga iba pa nga aspeto han rebolusyon Pilipino, an anuman nga diri makakab-ot pinaagi han proseso nga pankamurayawan makakab-ot gi-hapon ha kaurhian ha hul-os nga pagdarag-an han gerra han katawhan kontra ha bagakolonyal ngan bagapyudal nga sistema nga naeksister ha nasud. **AB**

Gatus-gatos kayukot nga Pilipino ha langyaw nga labnasan, ginpapalayas

Gatus-gatos kayukot nga Pilipino an ginpapalayas yana ha iba-iba nga lugar han kalibutan ngan nahiaagum hin grabe nga kabangisan ha proseso han deportasyon. Labaw pa hini, an pwersado nga deportasyon nagdudurot hin mabug-at nga dislokasyon ha ira pangina-buhi.

Ha South Korea, hiluagan an pan-ngangaresto, deportasyon ngan pan-

mumuyopoy ha diri dokumentado nga mga dayo, kaupod an 28,529 nga trabahador nga Pilipino didto. Para igpatuman an igintalaan nira nga kota nga 3,000 nga deportasyon kada bulan, ginsusurod han mga pulis ngan otoridad ha imigrasyon an mga pabrika, istasyon han tren, singbahan ngan iba pa nga lugar para arestuhon an mga langyawanon nga waray papeles.

Ha pag-aresto ha ira, nagamit an mga otoridad hin makaharadlok

nga *taser* o pusil nga nakuryente ha target ngan nagdudurot hin pagka-dismasyo. Bisan an mga may-ada sakit ngan burod diri talwas hini nga diri makatawo nga pamaagi. Baga-impverno an kondisyon nira samtang aada ha prisuhan. Ginto-tortyur ngan ginrereyp an iba. An iba naman nga nag-aatentar umeskapo ginpapasul-an kundiri man ginpapatay. Antes pagtambakon nga baga-baga sardinas ha barko nga magdedeport ha ira, damo na ha ira an nagkamatay tungod ha kapagalan, sakit ha baga ngan grabe nga pagkauhaw.

Ini nga pandarahug hugot nga ginkondenar han Migrante International, usa nga pankalibutan nga asosasyon han mga migrante nga Pilipino. Diri nira matugkad an sugad hini nga pagmaltrato ha mga migrante ha luyo han dako nga kontribusyon ngan mahinungdanon nga serbisyo nira ha katilingban nga South Korean.

Diri na ngani nabulig, ginsupportahan pa han Philippine Ambassador ha South Korea nga hi Luis T. Cruz ini nga deportasyon ngan nagsering nga normal la an sugad hini nga proseso tungod kay may praktis daw kuno an mga trabahador nga Pilipino nga lumahos ha nakatalaan ha kontrata. Sering han Migrante, ini nga pahayag usa nga dako nga insulto ha mga biktima han kabangisan ngan mga migrante nga Pilipino ha kabug-usan. Nagpapamatuod la ini han kriminal nga pagpasibaya han rehimen Arroyo ha katawhan hini.

Ha Malaysia, naabot ha 150 ngada 300 nga diri dokumentado nga Pilipino kada semana an ginpapalayas tikang ha Sabah. Kaupod dinhi an duru-dekada na nga naestar didto ngan mga didto natawo, dumako ngan nanginabuhi. Gintantantiya nga may-ada 200,000 nga



diri dokumentado nga migrante didto.

An pag-iistrikto diri na bag-o ha gobyerno nga Malaysia. Hadton 2005, nagsuhol pa ini hin 560,000 nga People Volunteer Corps (Relas ha lokal nga pagbansag), nga gintatagan hin 100 *ringgit* (P1,361) ha kada diri dokumentado nga trabahador nga madadakop hini. Warray kabatiran an mga Relas ha tama nga proseso han pan-ngangaresto ngan respeto ha tawhanon nga katungod ngan internasyunal nga makatawo nga balaud.

Sumala ha Migrante International, gin-gagamit la han State Government of Sabah an mga migrante nga Pilipino kada eleksyon, may-ada pana-panahon nga pagtrabaho ha agrikultura ngan paglalaging ngan pagkatapos ginpapalayas kun diri na kinahanglan. An urhi nga eleksyon ha Malaysia ginhimo hadton Marso 8 ngan iginlalansar kada upat katuig.

Ginpahimatngunan han Amnesty International, usa nga grupo ha tawhanon nga katungod, an gobyerno nga Malaysia kontra ha pirit nga ginpapalayas han mga Pilipino tikang ha

Sabah. Sumala hini, damo ha ira mga *refugee* ngan napiritan mag-ebakwet ha pungkay han gerra ha Mindanao.

Hini naman nga Hunyo, nagpagawas an European Union (EU) hin mas istrikto nga palisiya ha imigrasyon. Nangangahulugan ini nga palalayason an mga diri dokumentado nga langyawanon kaupod an ira mga anak. Poyde liwat hira igdetenir hin tubtub 18 kabulan, ngan pagdid-an nga bumalik ha nasud hin lima katuig. Kun maaaprubaran han parlamento nga EU, maeppekto an palisiya ha 2010.

Makusog nga ginkondenar ini nga bag-o nga pitad. Ha ngaran han pag-ato kuno ha terorismo, an mga migrante labina an mga tulin nga diri busag, nagigin bulnerable nga target. Ha 953,519 nga trabahador nga Pilipino ha Europe, gintatantiya nga diri mamenos ha 112,990 an diri dokumentado.

Ha Italy, diri pala maiha ginaprubaran liwat an palisiya nga magtutugot nga prisuhon an mga diri dokumentado nga migrante ha temporaryo nga mga prisuhan o *holding centers* hin 18 kabulan, tikang ha nahina nga duha kabulan. Poyde hira igdetenir hin tubtub upat katuig kun mag-utro pagtalapas. Ginkokonsidera na liwat nga krimen an pagpapaplete hin estaran ha mga "iligal" nga langyawanon. Ha 128,080 nga Pilipino nga naestar ha Italy hadton 2006, naabot ha 20,000 an diri dokumentado. Hadton 2005, 70% han migrante nga Pilipino ha Italy in kababayin-an.

Nananawagan an Migrante International nga igsuspinder dayon kundiriman diru-deretso na nga ihunong an hiluagan ngan mabangis nga pag-iistrikto ha mga diri dokumentado nga langyawanon. Ginpapabaton nira an rehimen Arroyo hini, nga kinahanglan manguna ha pagsalbar ha kalugaringon hini nga katawhan. AB

Bayad ha leyaltad

Hadton Hulyo, nagin landaw an sunud-sunod nga pagtuin ni Gloria Arroyo han iya mga niyu-tiyo ha ginlalawayan nga mga posisyon ha gobyerno. Diri la ini kabalyo han ira leyaltad ngan padayon nga pagsupporta. Pamaagi liwat ini han barkadahan Arroyo para seguruhon nga aada ha kontrol hini an maghinungdanon ngan sensitibo nga ahensya ngan departamentong nagkokontrol ha dagko nga pundo.

Pinakagarapal hini an pagtuin ha anay hepe han National Economic Development Authority (NEDA) nga hi Romulo Neri komo pinuno han Social Security System (SSS) ngan National Social Welfare Program (NSWP) hadton Hulyo 9. Komo pinuno hadto han NEDA, ginkonsabo ni Arroyo hi Neri ha pagpalusot han kontrata nga NBN-ZTE, nga gindabihan han masobra \$350 milyones nga suburno. Ginpamatud-an ni Neri an iya "bugos nga kinabuhi" nga leyaltad kan Arroyo han dumiri hiya nga igbuyagyag an anomaliya ha kaso. Ha pagtuin kan Neri ha SSS ngan NSWP, waray na makakaulang kan Arroyo ha paghakin ha masobra P200 bilyones nga pundo han milyun-milyon nga pribado nga trabahador ngan P45 bilyones pa nga pundo han NSWP para ha iya kalugaringon nga interes ngan pagpapadako han pundo para ha pampolitika nga maniobra.

Igin-asayn naman ni Arroyo hi Zenaida Ducut komo pinuno han Energy Regulatory Commission hadton Hulyo 10.

An pag-asayn ha iya pinakaurhi la ha mga maniobra han pamilya Arroyo nga gipiton an Meralco ngan padayon nga maglanat hin mas dako nga kalugaringon nga pagpuhos ha sektor han enerhiya.

Anay kongresista hi Ducut han ikaduha nga distrito han Pampanga nga ginsaliwnan han suhag nga anak ni Arroyo nga hi Miguel

"Mikey" Arroyo. Nagserbe liwat hiya nga *deputy chief presidential counsel* ni Arroyo. Sumala ha mga sumat, iginbutang hi Ducut ha pwesto komo bayad ha iya papel ha pagtukod han Transpacific Consolidated Resources Inc. (TCRI), usa nga kompanya nga pan-enerhiya. Ha luyo han dudable nga kwalipikasyon han TCRI, iginhatag dinhi han National Power Corporation hadton Marso an duha nga kontrata nga nabalor hin P1.27 bilyones. Sumala ha mga papeles hini, kalakip ha mga "tag-iya" han TCRI an duha nga nagngangaran nga "Leslie" ngan "Ressie Ducut" nga nakabase ha Pampanga. Han mabuksas an maanomaliya nga kontrata, ginnegaran ni Zenaida Ducut nga paryente o kakilala manla an duha. Gindududahan yana han kadam-an nga an kompanya usa la nga prente nga korporasyon nga gintukod han mga Ducut para ha pamilya Arroyo.

Kadungan hini, ginseguro ni Arroyo nga aada ha kontrol han iya mismo pamilya an


kwartahon nga komite han enerhiya ngan natural nga karikuhan ha Kongreso. Ginbotusan utro ha pwesto komo pinuno han komite ha enerhiya an iya suhag nga anak nga hi Mikey Arroyo samtang aada naman ha kamot han iya bayaw nga hi Ignacio Arroyo an komite ha natural nga karikuhan nga asya an nagdudumara ha mga kontrata ha pagmimina.

Antes kanda Neri ngan Ducut, patag-usa na nga iginpupwesto ni Arroyo ha mga mapulsanon nga ahensya an mga perdido nga kandidato han iya koalision nga Team Unity (katapos an usa katuig nga pagdidiri). Mismo hi Exec. Sec. Eduardo Ermita an nag-amin nga ini nga mga posisyon bayad ha paggapil han nasering nga mga politiko kan Arroyo hadton nakalabay nga eleksyon. Pinakalandaw dinhi an pagtuin kan Ralph Recto komo pinuno han NEDA bisan waray hiya kwalipikasyon para ha posisyon.

Han maabrihan naman an NAIA 3 hadton katapusan han Hulyo, ginkonsidera nga tapos na an trabaho didto ni Mike Defensor ngan iginbalhin hiya ha diri harumamay nga mas mapulsanon nga posisyon komo pinuno han proyekto nga Northrail.

An naperdi nga kandidato pagkagobernador han Pampanga nga hi Mark Lapid igin-asayn ni Arroyo komo *general manager* han Philippine Tourism Authority. Iginduduso liwat kuno an usa pa nga igkasi Kapampangan nga hi Emmanuel Angeles, *chancellor* han Angeles University

Foundation, para mamuno ha CHed. Samtang, hi Cristina Enrile, asawa han suok nga alyado ni Arroyo nga hi Sen. Juan Ponce Enrile, igin-asayn komo embahador ha Vatican, kun diin ginbanabana nga mai-



impluwensyahan niya hi Pope Benedict XVI nga pumabor ha rehimen.

Kadungan hini, libang naman hi Arroyo ha pagrigodon ngan pagsarusaliwan han mga tawuhan ha iya kabinete para mapaboran an iba pa niya nga niyu-tiyo. Hadton Hunyo, iginbutang niya komo *adviser* ha ertestorya pankamurayawan hi Gen. Hermogenes Esperon katapos an pangatungdanan niya komo hepe han AFP. Ginsaliwnan niya hi Jesus Dureza nga gintuinan naman nga *press secretary*. An anay *press secretary* nga hi Ignacio Bunye iginpwesto naman ha Monetary Board. Iginbutang liwat niya komo membro han kabinete hi Silvestre Bello III, anay *adviser* ha ertestorya pankamurayawan. Ginsaliwnan niya ha kabinete hi Ricardo Saludo, nga yana pinuno han Civil Service Commission. **AB**

Pagseguro ha kabuwason

Samtang ginseseguro ni Arroyo an pagpabilin niya ha pwesto ha presente, iginpupwesto na liwat niya an iya mga tawuhan ha mga importante nga sanga han gobyerno komo pagseguro ha iya kamutangan lahos han 2010. Prinsipal dinhi an pagseguro nga katin han iya mga kasangkayan an mga sanga nga poyde magin mapagdesisyon ha iya kabuwason--an Korte Suprema, opisina han Ombudsman ngan Sandiganbayan.

Pag-abot han 2010, ngatanan na nga mga huwes ha Korte Suprema mga tinudlok na ni Arroyo. Magreretiro na ha masunod nga tuig (2009) an unom ha ira samtang haros ngatanan han mahisasalin mga anay tawuhan ngan kilalado nga suok ha iya barkadahan.

An opisina han Ombudsman yana aada ilarum han kontrol ni Merceditas Gutierrez, kilalado nga opereytor ngan suok nga sangkay ni Mike Arroyo, asawa ni Gloria. Ilarum han iya pamumuno, nahunong an pagpoproseso han damo ha mga kaso nga gindadabihan han mga suok nga alyado han barkadahan Arroyo. Nagin instrumento an Ombudsman para gipiton an mga politiko nga nakontra ha mga niyu-tiyo ni Arroyo.

An opisina naman han Sandiganbayan ginpapa-munuan na ni Diosdado Peralta, usa nga suok nga sangkay han pamilya Macapagal. Hinay-hinay na liwat nga ginpapalayas ni Arroyo an mga independente nga tawuhan han Sandiganbayan pareho kan Dennis Villa-Ignacio. Hi Villa-Ignacio usa ha mga prosekutor ha kaso nga pandarabong han anay presidente nga hi Joseph Estrada. Pirit hiya nga ginpaparesayn yana han mga alyado ni Arroyo. **AB**

Ismagling, premyo kan Enrile

Nabuksas diri pala maiha nga makusog an operasyon nga ismagling nira Sen. Juan Ponce Enrile ha Cagayan Special Economic Zone and Freeport (CSEZF) ha Port Irene, Cagayan.



Komo usa ha mga aktibo nga pampolitika nga alyado ni Gloria Arroyo, nakarawat hi Sen. Juan Ponce Enrile hin dako nga mga konsesyon ngan pabor para ha iya mga negosyo ngan mas dagko nga ilegal nga makukuhaan hin karikuhan. Kalakip ha mga nabuksas nga dako nga premyo nga nakuha ni Enrile an hiluagan nga operasyon han ismagling han CSEZF.

Iginhatag ni Arroyo kan Enrile an pagdumara ha CSEZF pinaagi han Cagayan Economic Zone Authority (CEZA). Iginpwesto naman ni Enrile komo administrador han CEZA an sangkay niya nga hi Jose Mari Ponce ngan an umagad niya nga hi James Kocher para dumaraon an operasyon han ismagling didto.

Sugad nala an kamaungod ni Enrile nga ignegar nga hiya an nagpapaluyo han ismagling ha Port Irene tungod kay maaram hiya nga uugupan hiya han Malacañang. Kamatuoran, pira kaadlaw katapos mabuksas an operasyon nga ismagling nira Enrile, nagpahayag dayon an mga tagapagyakan ni Arroyo nga waray ismagling ha pyer tungod kay diri naman igindidiri didto an pagpasakob hin mga ginangkat nga segunda-mano nga sarakyan. Hini nga Hulyo 31, personal pa nga binisita hi Arroyo ha CSEZF para igpakita an suporta kan Enrile.

Hadton 2002, iginpagawas ni Arroyo an EO 156 nga nagdidiri ha importasyon han mga marahalon nga segunda-mano nga sarakyan nga igbabaligya ha Pilipinas. Baton niya ini ha reklamo han mga langyawanon nga kompanya nga may-ada mga planta nga nag-aasembol hin mga sarakyan ha nasud. Ha ginhimo nga interpretasyon hini han Korte Suprema hadton 2007, lupgop han pagdidiri an anuman nga lugar ha nasud.

Kundi komo suburno ha suok nga mga alyado ni Arroyo, naghimo hin tuis nga interpretasyon an Malacañang ha kalugaringon nga EO ngan nagsering nga ha Subic Freeport la igindidiri an pagpapasakob hin mga gin-import nga segunda-mano nga sarakyan. Ginpapaboran ngan ginpoproteksyunan han Malacañang an mga operasyon ha ismagling han mga paborito nga alyado ni Arroyo, kaupod hi Enrile. Pira ha iba pa niya nga alyado nga napapaboran han pareho hini nga pribilehiyo amo hira Luis "Chavit" Singson han Ilocos Sur ngan nga Garcia ha Cebu. **AB**



Dole-Stanfilco, ginsirutan han BHB

Ginreyd han usa kaplatun han mga Pula nga mangaraway han Valentin Palamine Command (VPC) hadton kaagahon han Hulyo 24 an plan-tasyon han Dole-Stanfilco ha Luna Sur, Makilala, North Cotabato.

Ginsunog han mga gerilya an upat nga *mobile packing vehicle* ngan duha nga *water truck*. Gindis-armahan liwat an mga gwardya han kompanya hin duha nga higlaba nga armas. Gin-ambus liwat han mga Pula nga mangaraway an mga inabot nga reinporsment.

An reyd ha Dole-Stanfilco aksyon pagsirot kontra ha waray hunong nga panlulupot han kompanya ha mga umhanan han gudti nga parag-uma ngan mga Lumad ha North Cotabato ngan iba pa nga parte han Far South Mindanao.

Han igmando ni Pres. Diosdado Macapagal (tatay ni Gloria Arroyo) hadton 1964 nga papletihan han National Development Corp. an 8,000 kaektarya nga primera klase nga agrikultural nga katunaan ha Amerikano nga kompanya nga Dole Philippines ha kantidad nga ₱1 kada ektarya kada tuig, yukut-yukot nga parag-uma ngan Lumad an napalayas ha ira katunaan. Masobra na upat kadekada an nakalabay, kundi waray pa gihapon hunong an pagpapahilug han kompanya. Luggop na hini an diri mamenos ha 30,000 kaektarya ha Far South Mindanao pa la, ha mga probinsya han South Cotabato, North Cotabato ngan Sarangani. Igindaitol hini an "*rural development*" kuno para maengganyar an mga parag-uma nga igpaumaya an ira katunaan ngan sumakob ha mga kaayusan sugad han "*growership*," "*lease contract*" ngan "kooperatiba." Pinakaurhi hini nga nakontrol an magtambok nga agrikultural nga katunaan ha North Cotabato nga igin-pailarum ha pagbalyo-hin-gamit para magin plantasyon han saging nga

pan-eksport.

Mas grabe pa, an hiluagan nga paggamit han Dole-Stanfilco hin mga pestisidyo ngan *fungicide* ha kasagingan nagin remalaso ha mga puno han lansones ngan rambutan ha kasapit nga katunaan. Yana nga tuig gutiayay la an magigin ani han mga nagtatanom hin prutas ha mga bungto han Makilala ngan Kidapawan tungod kay tikang pagtikang ngan an sagingan, gin-atake na han mga peste an ira mga tanom ngan puno han kahoy. Maniobra liwat ini para mapiritan an mga parag-uma nga igbaligya an ira tuna kundiri man direkta ini nga luputon han langyawanon nga korporasyon.

Kaangayan liwat nga sirutan an

Dole-Stanfilco para ha paniniyupi ha mga trabahador hini, paggamit ha militar para puypuyon an ira mga lehitimo nga protesta ngan gipiton an ira mga panmasa nga lider.

Pareho han langyawanon nga minahan nga Xstrata-SMI nga ginsirutan liwat han mga gerilya han Valentin Palamine Command yana nga tuig, ginkakangalsan han mga trabahador ngan parag-uma han Mindanao an Dole-Stanfilco. Maiha na nga nag-aantos an katawhan nga Moro, Lumad ngan settler ha kahamad hini nga kompanya nga nanlulupot han ira katunaan ngan kinita na hin bilyun-bilyon dolyares tikang ha dugo ngan balhas han masa. Sering han VPC, responsabilidad naton nga bawion ini nga katunaan para maibalik ha mga parag-uma ngan trabahador nga mga Pilipino nga kaangayan manag-iya hini. AB

Kaaway, nahiagum hin 19 nga kaswalti ha ambus han BHB ha Abra ug Kalinga

Unom nga sundalo han 41st IB an namatay ngan siyam an nasamaran ha ambus nga iginlansar han usa nga yunit han Agustin Begnalen Command han Bagong Hukbong Bayan-Abra (ABC-BHB) hadton kulop han Agosto 1 ha Barangay Duldulao, Malibcong, Abra. Kaupod ha mga nasamaran an lider han platoon nga hi 2Lt. Junemar Tutoy. Ha Kalinga, tulo nga sundalo an namatay ngan usa an nasamaran han ambuson han BHB hadton Hulyo 31 an mga tropa han 21st IB ha Sityo Lagwak, Barangay Limos, Pinukpuk.

Ha Abra, usa nga riple nga M16, mga bala ngan usa nga bakpak tikang ha usa nga sundalo han usa nga platoon han Bravo Company an nakumpiska han mga Pula nga mangaraway ha lima kaminutos nga ambus. Nagpapatrolya hadto an militar ha mga baryo han Poblacion, Bayabas ngan Duldulao han pabuthan hira hin *command-detonated claymore mine* han BHB.

Nahitabo ini nga ambus usa kaadlaw katapos han duha kaadlaw nga pagbisita ni Arroyo ha probinsya han Apayao ngan Tuguegarao City kun diin duro kahambog nga ginmanduan niya an mga opisyal han 5th ID nga rumkon an armado nga rebolusyunaryo nga kagiusan antes an 2010. AB



25 nga armas, nakumpiska han BHB

Inabot ha 25 nga armas an nakumpiska han Bagong Hukbong Bayan (BHB) ha mga taktikal nga opensiba ha iba-iba nga dapit han Pilipinas tikang Hulyo 20 tubtub syahan nga semana han Agosto. Unom liwat nga elemento han kaaway an namatay ngan siyam an nasamaran hini nga mga opensiba. Haros kadungan han mga aksyon militar han BHB iginpahayag ni AFP Chief of Staff Alexandor Yano hadton urhi nga semana han Hulyo nga napakyas an ira *internal security operations* (ISO) kontra ha BHB hini nga ikaduha nga kwarter han tuig. Duha an iginrason--an pagpatuman kuno hin "*relief and rehabilitation operations*" han mga sundalo ngan an pag-atras ha "*sistema nga papremyo*" han gobyerno Arroyo.


Agosto 2. Naglansar hin harassment an usa nga tim han Nerissa San Juan Command (NSJC) han BHB-Catanduanes kontra ha gintig-ob nga tropa han 65th IB ngan PNP Regional Mobile Group ha Barangay Magsaysay, Viga, Catanduanes. Duha an namatay ngan usa pa an nasamaran hini nga daklit nga aksyon militar.

An agap nga pagpapadangat han datos han mga residente ha gios han kaaway an nagin yawe ha madinaugon nga pagbanat ha pasista nga kaaway, sumala kan Ka Theresa Magtanggol, tagapagyakan han NSJC-BHB. Tungod hini, nakadispers dayon an mga Pula nga mangaraway ngan pinusisyon ha paborable nga lugar samtang tig-apike an mga sundalo.

Ginpanhimuwa hini nga taktikal nga opensiba an pahayag han

AFP nga waray na nagios nga mga Pula nga gerilya ha Catanduanes ngan kontrolado na kuno han militar an 31 nga baryo ha isla. Pagbulos nga sirot liwat ini han BHB ha padayon nga pagsabrag hin terorismo han Philippine Army ngan PNP ha erya tikang Hunyo 3 ngada yana.

Agosto 1. Natapos an pagseserbisyo nira Manolo Basilan, presidente han Association of Barangay Captains han Ligao, ngan Jessie Briones komo mga paniktik nga ahente han 9th Infantry Division han umato hira samtang gin-aaresto han mga operatiba han Santos Binamira Command han BHB-Albay ha Borocborocan, Barangay Herrera, Ligao City, Albay. Sumala kan Ka Greg Bañares, tagapagyakan han NDF-Bicol, nakumpiska kanda Basilan an duha nga pistola nga kal .45 ngan usa nga In-



gram *machine pistol*.

Hulyo 31. Usa nga elemento han CAFGU an nasamaran han harason han mga Pula nga mangaraway han Bagong Hukbong Bayan-Prente Gerilya 53 an detatsment han 38th IB ha Barangay Temporan, Magpet, North Cotabato.

Hulyo 30 han gab-i. Gin-atake han mga gerilya han Pulang Bagani Command 1 an plantasyon han saging nga pananag-iyá ni Nonong Rodriguez ha Barangay Tigatto, Buhangin District, Davao City. Nakumpiska han mga kasama an usa nga pistola nga 9 mm, usa nga kalibre .22 rebolber ngan duha nga *shotgun* han mga gwardya. Ginsunog nira an upat nga *dump truck* ngan duha nga dako nga kagamitan.

Antes hini gin-atake nira an Cabaguio Farms ha Sityo Fatima, Barangay Mandug ngan an kasapit nga Lapanday Farms. Nakakahibang ha pakabuhi han mga residente ha palibot hini an mga operasyon hini nga mga plantasyon.

Hulyo 30. Duha nga sundalo an nasamaran han pauranan hin bala han mga gerilya han Prente Gerilya A4 an Kioya Patrol Base han 4th IB ha Sibagat, Agusan del Sur.

Hulyo 29. Nakakumpiska hin walo nga riple nga M16, pito nga pistola ngan mga bala an mga Pula nga mangaraway han Narciso Antazo Aramil Command (NAAC) han BHB-Rizal ha duha nga reyde kontra ha usa nga aktibo nga lider paramilitar ngan usa nga langyawanon nga minahan nga naghhibang han kalibungan ngan kaupayan han katawhan ngan mga empleyado hini.

Ha mando han Husgado han Katawhan han Demokratiko nga Gobyerno han Katawhan, gin-aaresto han



mga operatiba han NAAC ha iya balay ha San Rafael, Montalban, Rizal hi Ricky Garmino, 38 anyos ngan lanong nga lider han 3rd CAA Coy ngan han sindikato nga "Bonnet Gang." Tikang 2002, aktibo nga ahente paniktik han 59th IB hi Garmino ngan naupod na ha mga operasyon militar. Dabi liwat hi Garmino ha damo nga krimen kontra ha katawhan kalakip an pagpatay kan Pastor Solano han Born Again ngan anak hini nga ulitawo hadton 2002 ha San Rafael.

Ginpatukan hiya hin mabug-at nga sirot han husgado han katawhan tungod ha diri niya pagbabag-o ha luyo han makusog nga pahimatngon ha iya han rebolusunaryo nga kagiusan.

Nakumpiska ha iya an lima nga riple nga M16, duha nga pistola ngan mga bala han M203 *grenade launcher*.

Hiton liwat nga adlaw, gin-atake han usa pa nga yunit han NAAC-BHB-Rizal an minahan nga kompanya han Koreano ha Sityo Casili, Barangay Pintong Bocaue, San Mateo. Ini nga kompanya may-ada kuno proteksyon tikang ha usa nga nangangaran nga Major General Gupilan han AFP. Tulo nga riple nga M16, lima nga pistola ngan pira nga kagamitan ha pagmimina an nakumpiska han BHB.

Hulyo 23 han gab-i. Ha pangangabuso hini ha kalibungan, ha mga residente ngan mga trabahador hini, gin-atake han Roger Mahinay Command han BHB ha South West Front an *compound* han Philex Mining Corporation ngan han kontraktor hini nga United Philippine Drilling ha Sityo Sked 7, Barangay Nabulao, Sipalay City, Negros Occidental. Nakumpiska ha mga gwardya an usa nga *shotgun*, usa nga kalibre .38 nga rebolber ngan mga bala, usa nga *base radio*, upat nga VHF *hand-set* ngan tulo nga *intercom*. Katapos maihirayo ha lugar an mga trabahador ngan empleyado han minahan,

Ukoy-bubto, diri makaru-karawat

Waray pulos an panawagan nga ukoy-bubto han pira nga opisyal han rehimen Arroyo. Waray ini iba nga katuyuanan kundi tahuban an nahiaguman nga kapakyasan han Oplan Bantay Laya 2 (OBL2) ha tuyo hini nga pirdihon an armado nga rebolusyon.

Iginpagawas an panawagan makalabay an sunud-sunod nga magdinaugon nga mga taktikal nga opensiba han BHB, labina ha Southern Mindanao ngan Eastern Visayas, mga rehiyon nga target rumkon han OBL2 hini nga tuig.

Para diri direkta aminon nga pakyas an todo-larga nga kampanya militar nira kontra ha BHB, igindaitol nira an maiha na nga suspendido nga ertestorya pankamurayawan giutan han reaksyunaryo nga gobyerno ngan National Democratic Front ngan ginsering nga kondisyon an ukoy-bubto para utro ini buhion.

Kundi klarado dayon an desperasyon ngan pagigin doble-kara han AFP han ig-anunsyo hini, usa kaadlaw matapos an tanyag kuno han ukoy-bubto, an pagpadara ha Southern Mindanao hin usa nga *armored battalion*--naabot ha 700 nga tropa, mga tangke, kanyon ngan iba pa nga magbakod nga armas. Ha pagdugang hini nga mga tropa, katunga na han bug-os nga pwersa han Philippine Army an aada ha Mindanao.

Antes ini, gin-amin na liwat ni Lt. Gen. Pedro Inserto, hepe han AFP Central Command, nga pakyas an "solusyon nga Palparan" ha pagresolba ha "problema nga kontra-insureksyon" ngan nagpapagrabe pa lugod ini. Gintutudlok han "solusyon nga Palparan" an hiluagan nga ekstrahudisyal nga panmatay, pagsikmit ngan pagtalumpigos ha mga sibilyan nga

sundan ha "Ukoy..." paypay 15

ginsunog han mga gerilya an mga *bunker* han Philex.

Hulyo 22. Usa nga membro han *death squad* nga gintukod han 61st IB an ginsirutan han mga pwersa gerilya han BHB ha Sityo Cambuguiot, Barangay Camindangan, Sipalay City, Negros Occidental. Sumala kan Ka Nilo Magtanggol, tagapagyakan han BHB-Roger Mahinay Command, labot ha pagigin membro han CAFGU nga natindog nga *death squad*, hi Wilfredo Abendan usa liwat nga parupangawat hin karabaw nga nagbibiktima han mga residente han Barangay Camindangan.

Hulyo 21 han aga. Upat nga sundalo han 4th IB nga nag-oo-

perasyon an nasamaran han ambuson han mga gerilya nga pwersa han BHB ha Sityo Balete, Barangay Mirayan, Gloria, Oriental Mindoro. Kaupod ha nasamaran ngan gindara ha ospital hi Lt. Mark Orbista.

Hulyo 20. Ha Agusan del Sur, gin-ambus han mga gerilya nga pwersa han BHB an usa nga grupo han mga sundalo tikang ha 26th IB nga tipauli na ha ira detatsment. Nahitabo an ambus ha Barangay Osmeña, La Paz. Sakay han usa nga *mini-cruiser* an mga sundalo han pauranan hin buto han mga gerilya nga nakakaber ha masighot nga parte han kalsada. Nasamaran an usa nga tinyente. AB



Militarisasyon ha kabaryuhan, nagpapadayon

Padayon an mga pagtalapas ha tawhanon nga katungod ha kabaryuhan ngan kasyudaran. Masunod an parsyal nga report nga nakalap han *Ang Bayan* hini nga nakalabay nga duha kasemana:

Agosto 2. Basta nala nga ginpabalhin tikang ha PNP Custodial Center ha Camp Crame, Quezon City ngadto ha Manila City Jail (MCJ) hi Randall Echanis, 60 anyos, *deputy secretary general* han Kilusang Magbubukid ng Pilipinas (KMP). Hugot nga gintitipahan han mga kaurupdan, kasangkayan ngan kaupod ha militante ngan progresibo nga organisasyon an tigdaan nga pagpabalhin kan Echanis. Sering nira, usa nga detenido politikal hi Echanis ngan diri angay igtimpo ha mga tawo nga suspetsado hin mga ordinaryo nga krimen. Makakaraut liwat ha sensitibo

nga panlawas ni Echanis an pagbalhin ha iya. Gindakop hi Echanis han mga militar ngan pulis ha Bago City, Negros Occidental hadton Enero 2008 ngan gindetenir ha Southern Leyte ha kaso nga *multiple murder* kasumpay ha purgahan nga nahitabo kuno ha Inopacan, Southern Leyte hadton 1985. Kaupod niya nga ginkasuhan hira Prof. Jose Ma. Sison, Luis Jalandoni ngan hi Bayan Muna Rep. Satur Ocampo.

Hulyo 25. Ginsalawdan han 11th IB hin mga hinimu-himo nga kriminal nga kaso hira Felipe Gelle, *secretary general* han Bayan Muna-Negros; Vi-

marie Arcilla, *secretary general* han Karapatan-Central Visayas; Epefania Asentista han Karapatan-Negros; Ronald Ian Evidente han ANAKPAWIS-Negros; ngan Dionesio Baloy, lider han organisasyon han parag-uma nga Kaugmaon. An mga kaso nga iginsalawad kontra ha ira in iligal nga detensyon, *murder, kidnapping, grave threats* ngan *coercion*.

Hulyo 21. Ginpatay han mga sundalo han 21st IB hi Rocky Aboli, residente ngan opisyal han barangay han Upper Uma, Lubuagan, Kalinga. Nakilal-an an mga opisyal nga nagdakop ngan nagpatay kan Aboli nga hira Major Domingo, Lt. Aries Apduhan ngan Lt. Jay Alambra. Ha ira report ha hedkwarters han 21st IB, ginpagawas han mga sundalo nga hi Aboli usa kuno nga mangaraway han BHB.

Hulyo 18. Iligal nga gin-aresto ngan gindetenir han mga elemento han 65th IB hi Rowell Fernandez han Abihaw, Baras, Catanduanes.

Hulyo 12. Gintortyur han mga pasista nga tropa tubtub madismayo hira Nodante Pongan, Jr. ngan Norman Sales han Barangay Maysuram, Caramoran, Catanduanes. Ginharas liwat han mga sundalo hi Michael Torrente han Barangay Pagsangahan, San Miguel han mao manta nga probinsya.

Hulyo 10. Ginsunog han mga nag-ooperasyon nga mga sundalo han AFP an balay ni Eugenio Torres, Jr. ha Barangay Villa Aurora, Viga, Catanduanes.

Hulyo 9. Ginkastigo han mga elemento han Philippine Army an 16 anyos nga hi Jake Cristobal ngan 30 anyos nga hi Eddie Frias, puros taga-San Isidro, Pandan, Catanduanes.

Hunyo 3. Gin-atentaran pagpatay han mga operatiba nga paniktik han AFP an magtala-amay nga Rodrigo ngan Randy Sumayang han Barangay Asgad, San Andres, Catanduanes.

"Ukoy..." tikang paypay 14


kagiusan.

Napipiritan yana an AFP nga lumiso ha kun anu-ano nga palabas nga maniobra para tahuban an makaarawod hini nga pagkaperdi atubangan han gerilya nga pakiggerra han BHB. Mismo mga kumander militar han AFP an nagsering nga waray mayor nga naamkon nga kadaugan an militar ha pakig-away ha BHB hini nga ikaduha nga kwarter han 2008.

Sugadpaman nagpakabuta-buta an Malacañang hini nga kamatuoran. Ha kaurhian, ginsupalpal ni Defense Sec. Gilbert Teodoro an isyu han ukoy-bubto tungod kay diri kuno ini opisyal nga palisiya han rehimen. Diri gud maiduso han Malacañang an "ukoy-bubto" tungod kay katugbang ini han pag-amin nga pakyas an OBL2 ngan an linya han todo-todo nga gerra, ngan nagmamadinaugon an BHB.

Imbes nga ukoy-bubto, utro na liwat nga ginbuhi han Malacañang an tanyag nga "amnestiya" ha mga rebolusyunaryo nga pwersa nga una na niya nga iginproklamar hadton Agosto 2007. Gin-aaro hini ha Kongreso nga aprubahan an inisyal nga badyet nga ₱500 milyones para kuno ha mga masurender nga mangaraway han BHB dara an ira mga armas. Kundi seguridad nga maidudugang la ini nga pundo ha nahilaba nga listahan han mga programa nga garatsan ni Arroyo. Diri ini aasihon han mga rebolusyunaryo nga pwersa. Magurak an mga peke nga surenderi, mga pagpapasumpa kunuhay ha mga sinurender, pauru-utro nga paggamit han mga iginsurender kuno nga armas ngan iba pa nga panguwat.

AB



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XXXIX Ihap 15
Agosto 7, 2008
www.philippinerevolution.net

Editorial

Pabug-at nga VAT, ibasura!


Haros waray iba nga unod an masobra usa kaoras nga State of the Nation Address (SONA) ni Gloria Arroyo kundi an pagdepensa ngan paghatag-rason ha pag-imponer han Value Added Tax (VAT). Direkta niya nga iginbasura an hiluagan nga panawagan han katawhan Pilipino kontra ha VAT ngan iginrason an dako nga pundo nga nakokolekta tikang dinhi nga nagseserbe nga asya la an "depensa" han mga kablasanon atubangan han presente nga grabe nga krisis ha ekonomiya.

Ha pagdinepensa ni Arroyo ha VAT, ginpamatud-an na liwat niya an iya leyaltad ha imperyalismo ngan hugot nga pagsunod ha mga palisiya han imperyalista nga "globalisasyon." An pag-umento ngan pagpahilug-ag han VAT usa ha mga partikular nga palisiya nga igindikta han IMF ngan World Bank ha niyu-tiyo nga rehimen hadton 2006. Hini nga mga naglabay nga semana, pira kabeses nga nagpahimatngon an IMF-WB kontra ha pagtanggap han VAT. Para ha IMF-WB ngan rehimen US-Arroyo, an VAT an yawe nga palisiya para padayon nga makabayad han langyawanon nga utang, igpabilin nga nabiyaw an bangkrap nga gobyerno ngan pugnan an

utro nga paggurak han krisis ha pinansya.

Agud magin makaru-karawat ha katawhan an padayon nga pag-imponer han paras-anon nga VAT, iginhan-ay ni Arroyo an iya mga buaw nga programa nga kontra-kapobrihan. Gin-ngaranan niya nga "Katas ng VAT" an mga programa nga "subsido." Ginpapagawas nira Arroyo nga "pagpulos" ini han katawhan tikang ha VAT. Pero an ungod ginkakawat la an dako nga bul-to hini samtang nanhahatag hin makairinsulto nga sinsilyo nga limos ha mga naghihimakuri.

Iginhihinambog ni Arroyo nga an dako nga dugang nga kita ha VAT ha lana nahingangadto ha mga kablasanon. An ungod, ikatulo la han gintatantiya nga ₱30 bilyones nga dugang nga kita ha VAT yana nga tuig an igin-alotaga niya ha mga pasikat nga programa nga "pan-subsido." Sugadpaman, ribrib pa gihapon hini an nahingangadto ha mga kablasanon. Tinuyo nga waray istrikto nga sistema hin awditing ini para an dako nga parte hini mahibursa nira Arroyo ngan iya



mga niyu-tiyo. Naglal-away hira ha "Katas ng VAT" para labaw pa hira nga m a k a g - p a t a k a s ngan mas mapadako

Mga landaw hini nga isyu...

Hiluagan nga protesta iginlansar ha SONA
PAYPAY 4

Erestorya nga MILF-GRP
PAYPAY 7

Dole-Stanfilco, ginsirutan han BHB
PAYPAY 12

Mga instruksyon ha pag-iimprenta

1. An **ginsundan nga paypay**, nga eksakto nga kopya han paypay 1 gawas ha mas pus-aw an *masthead* o *logo* in para ha mga nagamit hin *mimeo machine* o nag-iimprenta ha pamaagi nga *v-type*. Gindesenyo ini para diri madali nga mahibang an istensil.

2. Pag-*print* ha istensil:

- a) Ha *print dialog*, i-check an **Print as image**
- b) Tanggalon an *check* ha **Shrink oversized pages to paper size**
- k) I-click an **Properties**
- d) I-click an **Advanced**
- e) Seguruhon nga naka-set ha **100%** an **Scaling**
- d) Ipadayon an pag-*print*

3. Gin-aaghat an mga kasama nga ipaabot ha patnugutan han *AB* an anuman nga problema kasumpay han pag-iimprenta pinaagi han *v-type*. Magpadara hin *email* ha *angbayan@yahoo.com*